



In dals lufs giuvens dal Calanda – fotografà ils 24 da schaner 2016.

UFFIZI DA CHATSCHA E PESTGA DAL GRISCHUN

## Anc 28 dis – il countdown per ils lufs va

■ (rtr) Fin la fin da mars ha l'Uffizi da chatscha e pestga temp: Enfin lura va il permiss per sajettar dus lufs giuvens dal triep dal Calanda. Il december passà aveva il cussegl federal permiss da sajettar duas bestgas giuvnas per uschia pudair scurrentar il triep or dals territoris abitads. Enfin uss han ils lufs giuvens dal Calanda gì cletg. L'enviern moderà ha salvà la vita ad els. Ils lufs restan numnadamain là nua che lur butin preferì – tschiervs, chavriels e chamutschs – sa chatta. Quai che fa pensiers a *Georg Brosi* è la uschenumnada 'habituaziun' – vul dir, sch' ils lufs sa disan memia ferm a la preschientscha dals umans e perdan uschia respect e tema dad els. La consequenza: I po vegnir adina pli savens tar scuntradas privlusas cun umans. Perquai na datti nagina remischun per ils lufs. Era sche lur cumportament è stà main marcant che auters envierns vegnan dus dals quatter lufs giuvens tuttina sajettads. Mo dad in enviern na sa laschia deducir nagin midament da cumportament insumma, di Brosi. Sche las circumstanzas per pudair sajettar els èn dadas ils proxims 28 dis, lura vegnan ils guardias da selvaschina da l'uffizi er a sajettar. I pudess perquai capitar ch'i vegn ils emprims d'avrigl ed ils lufs èn anc adina en vita. «Nus na stuain betg sajettar per mort e fin. Sche

quai fiss necessari avessan nus attratg els cun pavel per als pudair sajettar. Precis quai na vulain nus betg», di Brosi. Ils auters lufs na pudessan lura betg emprendre che la preschientscha da l'uman è privlusa. En ina contribuziun da la Rundschau aveva la Gruppa Luf Svizra criticà ch' ils lufs vegnian attratgs entras las plazzas d'estga da la chatscha da lajjet sin vulps e na vegnian betg da sai or en vischinanza dals umans. Critica che Brosi n'accepta betg: «Nus avain reglas cleras per las plazzas da l'estga. Quellas na dastgan betg esser memia damanaivel dad abitadis. Quai stà tut en las prescripziuns da chatscha e vegn surveglià entras nosas guardias da selvaschina.»

Il triep dal Calanda è furmà dad 8–10 lufs. Ils pitschens da l'onni passà èn anc da la partida. Quels pli gronds bandunan il triep. Dal Calanda èn els gia viandads enfin en Germania e Frantscha. En il Tes-sin datti in segund triep da lufs che na deriva betg da quel dal Calanda. Er en il Vallais as spetga ch' ils lufs sa reproduce-schan e furman in triep.

Alerts èn er ils adversaris dal luf: lur ura pudess batter l'emna proxima a Berna. Ils 9 da mars discussa il cussegl dals chantuns la moziun Imoberdorf che vul levgiar la chatscha sin il luf e pussibilitar ella durant tut l'onni.